

(١٤)

أوهام نبيلة

أهو نجرب

نقوم نركع نصوم نفطر وبنقرب

ساعات نفرح و نتبسم

وأكثر منها نلقانا

بنتداری

فی أوهام جوه ساكنانا

شجن بيفيض يغطينا ويملانا

ونتوكل ... ونترهب ... ونتبتل

أغانى تصادر الفرحة

نرثم فيها ونرتل

اتاريننا فى مشوارنا

بنبنى فى حواجزنا بنعلى بكل اسوارنا

ونغزل وهمنا واحة

نسيب جنة .. عرقنا اللى يحققها ... لحلم بجنة مرتاحة

ولما نصحى نتفاجئ بإن العمر متسرب

فى مشوارنا ... بنتصارع ... بنتسلق شجر فارع

ساعات نكسب ... ساعات نعلى

وفجأة نبص تحتينا

يضيع الحلم جوانا تتوه السكة نتضال

مكاسبنا ... بقدرتنا؟؟؟؟

وغيرنا ليه بيتكسر؟؟

وليه الحلم متفسر؟؟ ولية الفيلم ومقاساتنا متفصل؟؟

بطولة بتيجى بالصدفة ... ومبختارش

ويسندها بشر غلبان ... يجوز أحسن ... يجوز أطيّب
يعيش كومبارس ... ولا بيبانش
وأحس بأنه دور ظالم
مهوش ليه أنا لوحدى ... لكن للكل
واتبدل ...

هموم ع الروح بتتكثف ... أبص لغيرى و اتأسف
ويهرب من حياتى الطعم
واقول من تانى لجل ارتاح
أهو نجرب ... واعيش فى الوهم.

القاهرة ٢٠١٠/١/٢٤

